



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 7

Barcelona Open akokba sülen  
Nadal tanabuba jenjang tongogo

Nisung ajak nem Covid vaccine angati  
agütsütsüla: Rahul Gandhi

VOL. XVIII NO. 192 (ADOK 192) DIMAPUR

SANGTENNÜ (TUESDAY)

RONGCHII (APRIL) 27, 2021

₹ 5.00

## COVID-19 Nagaland: Nisung 55 dak putet

**Kohima, April 26 (TYO):** Hombarnü Nagaland nung nisung 55 dak COVID-19 putetba züngsema nisung ajak agi 13,238 kümogo.

"Tanü nisung 55 dak COVID-19 aliba putetogo. Parnokji Dimapur nung nisung 38, Kohima nung 9, Mokochung o Mon nung asemsem (3), aser Kiphire o Longleng nung kaka (1) lir. Ano, tanü nisung 3 taneptsü nguogo. Parnokji Phek nung nisung 2 aser Tuensang nung 1 lir" ta Health & Family Welfare Minister, S Pangnyu Phom-i metetdaksü.

Nisung 13,238 rongnungi 12,135 taneptsü nguogo aser tang nisung 727 anepaludar, ta paisa ashi.

"Nagaland nung COVID-19 nungi taneptsü angurji 91.67% dang lir" ta State Nodal Officer

for Integrated Disease Surveillance Programme, Dr Nyanthung Kikon-ia metetdaksü.

Nagaland nung COVID-19 alir nisung 98 asü saka parnok 10 bo tanga timtem ajanga asü. Külén, nisung 278 tashi tanga state temi ogo, ta paisa ashi.

"Tang anepalurtem rongnung nisung 67 dak shirangba yimya terara lir, 22 oxygen agidar aser 2 ventilator nung lir. Tanüngba nisung 636 dakbo shirangba yimya kecha mali" ta Dr Kikon-isa ashi.

"Nagaland nung COVID-19 alitsü akok ta temolung melemi bilemba sample 1,44,236 tendangogo. RT-PCR ajanga 77,751, TrueNat ajanga 37,934 aser Rapid Antigen Test ajanga 28,541 tendang" ta Dr Kikon-isa metetdaksü.

## Centre-i SII & Bharat Biotech dang vaccine jenjang ajemtsü ashir



karibo linük nung jenjang ka dang asütsüla ta takhangba agütsür.

Tawa company anati jenjang tasen metetdaksübaji May 1 nungi arishi küm 18 aser 45 tsüingda alirtem atema dang lir. Arishi küm 45 ser temapur, health care aser front line workers nembo sorkari vaccine angati agütsü ta shiogo.

India nung Oxford-AstraZeneca indang Covishield vaccine yanglur SII-i dose ka nung state sorkar dang Rs 400 aser nija mozü kitem dang Rs 600 agi ayoktsü ta metetdaksüogo. Tang ya parnoki Centre sorkar dang dose ka nung Rs 150 agi ayoker.

Külén, Bharat Biotech-i Covaxin yanglur aser parnoki dose kaji state sorkar dang Rs 600 aser nija mozü kitem dang Rs 1200 agi ayoktsü ta shiogo. "Company-i Centre sorkar dang dose ka nung Rs 150 agi ayoker" ta Bharat Biotech chairman & managing director Krishna M Ella-i metetdakja liasü.

Ajisüaka, state sorkar aikati vaccine jenjang balala asüba atema ola adoker.

Delhi chief minister Arvind Kejriwal-ibo iba tensa ya tajangzük bushiba mapang ka masü ta shiogo.

**New Delhi, April 26 (Agencies):** Centre sorkari Covid vaccine yanglurtem-Serum Institute of India (SII) aser Bharat Biotech dang jenjang ajemtsü atema shiogo.

May 1, 2021 nungi India nung arishi küm 18 ser temapur ajak nem vaccine agütsütsü sentong renema aliba jakdang Centre-i tanü vaccine yanglurtem dang jenjang ajemtsü osang sangoktsü.

India nung Covid vaccine yanglur company anati jenjang atakzükba atema ashishitepba mapang ka nung Centre-i iba osang metetdaksü. Nisung kari Covid vaccine indang jenjang kanga tasak ta ashir aser ano

## University nung elective subject ka ama NCC akümer

**Guwahati, April 26 (Agencies):** Universities Grants Commission (UGC)-i university ajak nung vice-chancellor tem dang General Elective Credit Course ka ama NCC training dendaktsütsü tetuyuba agütsüogo.

Iba osang ya Northeast Region nung NCC Additional Director General Major General Ananta Bhuyan-i pelaa agizükba metetdaksü.

"Iba ya mapa tajung ka lir aser tarutsü nung cadet temi tajangzük tulu angutsü. Border Areas Expansion Plan nung cadet talila agütsütsü tashi agüja lir aser iba nung teyari tulu angutsü" ta

Major General Ananta Bhuyan-i ashi.

Küm ana nungi pungu tashi training agiba sülen B aser C Certificate tatidang agütsüba cadet temi iba ajanga tajangzük angutsü, ta paisa ashi.

April 15, 2021 nü UGC-i vice chancellor tem dang NCC Directorate tem nung State ktdangsurtem den iba osang jangjashitsü tetuyuba agütsüogo.

"NCC Cadets regular non-cadet students-i elective subject ka ama NCC shimtsü akok. Iba ya NEP 2020 den liromedema tetuyuba agütsüogo" ta Bhuyan-isa ashi.

## ECI ajanga Covid wara tanabuba prokshi: Madras High Court

**Chennai, April 26 (Agencies):** India nung Covid wara tanabuba prokshiba ya Election Commission ajanga lir aser parnok dak nisung tepsetba atema tai tongloksütsü akok, ta Hombarnü Madras High Court-i metetdaksüogo.

Covid wara adokba tiyalong nung state pungu nung assembly election agiba nung ajemdaker Madras High Court-i iba olen jembiogo.

Madras High Court-isa inyakyim shitak ka melira Deobarnü votes azüngba noktangsü ta amokmerenogo.

"COVID-19 wara tanabuba prokshiba ya nenok ajanga lir. Nür ktdangsurtem dak nisung tepsetba atema tai tongloksütsüla" ta Madras High Court-i Election Commission dang ashi.

Okadakibo tetuyuba agüja liaka EC-i nüboyimba maparen

mask enoktsü, sanitisers amshitsü aser nisung o nisung tsüingda tepila ayutsü inyakyim mebenshi ta High Court-isa ashi.

"Election rally tem agidang nenok kong liasü?" ta Chief Justice Sanjib Banerjee-i asüingdang.

Hokolbar tashi nung May 2, 2021 nü Covid inyakyim benshitsü atema renema aliba osang agüjang, aji ta mesüra votes azüngba anendaktsütsü, ta High Court-isa EC dang ashi.

Tamil Nadu Transport Minister MR Vijayabaskar-i High Court nung Karur constituency nung aliba counting halls nung Covid inyakyim benshitsü atema ken o benokba angadandang iba tetuyuba ya agütsü.

West Bengal, Tamil Nadu, Kerala, Assam aser Puducherry nung election agiba den külemi linük nung Covid wara tuluba aküm.

Brihostibarnü Election Commission-i West Bengal nung roadshow aser rally noktang aser nisung 500 dak tema madenshitsü tenokdangba agütsü. West Bengal nung shilem 8 lemsar agiba election nung shilem asem dang anünga lia EC-i iba tetuyuba agütsü.

EC-i iba tetuyuba magütsüdang Prime Minister Narendra Modi-i Covid senden ka aliba ajanga pai West Bengal nung nüboyimi aotsü aliba athir ta metetdakja liasü.

Iba jagi Wset Bengal Chief Minister Mamata Banerjee-i Election Commission dang kechiba PM-i osang sangoktsüba sülen ang Covid tenokdangbatem agütsü ta asüingdanga liasü.

Election Commission dang West Bengal nung election agitsü aliba shilem ajak ka kümer agitsü atema lai mepishia arur saka ibaji magizükba atema lai EC aitsü.

## NLA select committee-i SARFAESI Act atema senden amen

**Kohima, April 26 (TYO):** Hombarnü Nagaland Legislative Assembly (NLA) nung SARFAESI atema Select Committee-i RBI aser bank ktdangsurtem den senden ka menogo.

Senden Chief Minister Neiphui Rio menden ser amen aser züngsemtem Deputy CM Y Patton, Leader of Opposition T.R. Zeliang, NLA Speaker Sharingain, Minister Neiba Kronu, Minister Tonpang Ozukum, Advisor Toshi Wuntung, MLA Imkong L Imchen nung den Chief Secretary tetushi tejaoker ka ama aden.

Senden nung Law & Justice

as er Finance Department tem aser RBI- DGM Gauhati Haridas Sarode, aser AGM SBI & SLBC Bankers, Dimapur convenor Abinash Hembrom nungertem aden.

Senden nung adenertemi SARFAESI Act 2002 b, Arlla 371 A aser Nagaland Land and Revenue Regulation Act 1978 & 2002 indang tebilembatem lemsatop.

Tanü senden nung onük balala benoka olemtepba sülen ano züngsemtemi tangartem den asüingdangyateptsü telemetba agi. State sorkaria bank ktdangsurtem dang taruba

senden nung Land Reforms talila bener arutsü nangzük.

SARFAESI Act ya Linük Temzüng nung Arlla 371A den meputepba agi February 15, 2021 nü Nagaland Legislative Assembly-i SARFAESI Act 2002 ya select committee kati repringshimtsü atema telemetba agia liasü.

Select committee ka nem Securitisation and Reconstruction of Financial Assets and Enforcement of Security Interest (SARFAESI) Act repringshimtdaktsütsüba ya NLA nung ruling aser opposition züngsem ajaki agizük.

## Covid-19 vaccine peria maliba atema NPF-i tebilemstü abener

**Dimapur, April 26 (TYO):** Nagaland nung Covid-19 vaccine dose mezüingbuba peria maliba atema Hombarnü Naga People's Front (NPF)-i tebilemstü khuret abenba metetdaksüogo.

State sorkari health sector nung aser talisa Covid-19 wara nung temolung agütsütsüla ta Press Bureau, Naga People's

Front-i sangdong ka nung ashi.

State sorkari vaccine peria bener arutsüla aser tagitsüpur ajak agitsüsa nübertem dang vaccine indang osang tejangja sangoktsütsüla, ta parnokisa ashi.

May 1, 2021 nungi arishi küm 18 ser temapur ajaki vaccine agitetsü ta Centre sorkari metetdaksüogo saka Nagaland

nung vaccine peria mali ta osang angashidang mepelar, ta NPF-isa metetdaksü.

"Nagaland nung vaccine peria mali süra state sorkari Covid wara tanabuba anema koma inyaktsü renema lir? State sorkari vaccine mezüing dose magitertem asoshi kechi inyaktsü sentong lir?" ta NPF-isa asüingdangogo.

## Principal Accountant General office-i nisung aruba noktanger

**Dimapur, April 26 (TYO):** Kohima nung Principal Accountant General (Audit) aser Principal Accountant General (A&E) office-i nisung aruba noktanger ta tanü osang metetdaksüogo.

Temelaba aliba Departmental Nodal Officers dang office telungi aيتدaktsütsü. Külén, Treasury aser Divisional accounts ajak Office indang ground floor nung agizüktsü aser temelaba aliba ktdangsurtem screen asütsü, ta sangdong ka nung ashi.

Payslips, Pension, GPF aser Loan atema sorkar mapa inyakertem/Pensioner temi

Deputy Accountant General (A&E), Uttam Chanda, IAAS dangi chanda.u@cag.gov.in m e s ü r a agaenagaland@cag.gov.in nung shidi zültsü akok.

Külén, Audit dak sendakba atema Sr. Deputy Accountant General (Audit), Vivek Kumar Bhaskar, IAAS at bhaskarvk@cag.gov.in or agaunagaland@cag.gov.in dangi zültsüla.

Maneni, tsünglanglen agüja aliba ktdangsurtem den phone ajanga tongtepreteptsü akok.

1. Joseph K.A, Sr. Accounts Officer # 9436216580 (for Pension matters)
2. Ashim Kr. Dey, Sr. Accounts Officer # 9436434188 (for Loan matters)
3. Arup Roy, Sr. Accounts Officer # 9436601437 (for Payslip matters)
4. Akum Chuba, Sr. Accounts Officer #9436005112 (for GPF matters)
5. Shaji K, Sr. Accounts Officer # 8848574307 (for Payslip matters)
6. Rajesh Pan, Sr. Audit Officer # 9436607883 (for Audit matters)
7. Bendangangnen, Sr. Audit Officer #9436435208 (for Estate matters)



## Security Forces temi NSCN (IM) züngsem ka apu

**Dimapur, Rongchii/April 26 (TYO):** Security Forces aser Police tem lungjemer April 24, 2021 nü General Area Diphupar, Dimapur nung operation ka agidang NSCN (IM) züngsem ka pua liasü.

Osang tejangja ka nung ajemdaker Security Forces aser State Police temi operation agiba mapang Diphupar nung



NSCN (IM) züngsem ka pua pa ket nungi sen lakh 13 jenjang Opium tuozük gram 800 nguteta liasü, ta sangdong ka ajanga ashi.

Ken o maneni bushisingdangtsü atema pua alisang den pa ket nungi ngutetba oset ya Diphupar Police Station, Dimapur nem amoktsüogo, ta sangdong ajanga

## State tesem ajungalen World Veterinary Day mungogo

**Dimapur, Rongchii/April 26 (TYO):** State kübok district ajunga nung April 24, 2021 nü World Veterinary Day ya "Veterinarian response to the Covid-19 crisis" omen nung ajemdaker munga liasü.

Iba anogomung ya Nagaland Veterinarian's Association (NVA) ajanga State department of Animal Husbandry & Veterinary Services den lungjemer ayongzüka liasü.

Iba anogomung nüngtem nung kiset shiruru nem angati mozü agütsü, mesen tepsetba mozü lema agütsü aser awareness sentong balala ayongzüka agia liasü.

### DIMAPUR DISTRICT

Dimapur District nung World Veterinary Day Doyapur village nung aluyimer den munga liasü. Iba sentong nung Deputy Director, Veterinary Hospital, Dimapur, Dr. K.N. Zubemo Humtsoe menden liasü aser NVA tir, Dr. Nsanthung Ezung, CVO, Dimapur ajanga okila o jembia liasü. Tashidak wara agi tesem ajungalen sünga aliba mapang Dimapur District Veterinarian ajanga inyakba maparen balala indang PowerPoint presentation ka VAS, Veterinary Hospital, Dimapur, Dr. Bocto Sumi ajanga agütsü.

Iba sentong nung Doyapur Village Council Chairman-ia o tatsüka jembia liasü aser Dy. Director, VPHC, DMC Dr. Sentiningla ajanga tepela ankep o jembia liasü.

Iba sülen Livestock Mela, Farmer's Orientation aser ano mineral aser vitamin meyoktepba lema agütsüba sentongtem agia liasü.

### KOHIMA DISTRICT

Kohima district nung World Veterinary Day ya 4th NAP Battalion Thizama nung agia liasü. Iba sentong agiba sülen Anti Rabies Vaccination sentong ka agia kiset shiruru nem mozü agütsü.

### ZUNHEBOTO DISTRICT

Linük ajunga den külemi Department of Animal Husbandry & Veterinary Services, Zunheboto ajanga April 24, 2021 nü World Veterinary Day anogomung sentong ya Veterinary Hospital, Zunheboto nung ayongzüka agia liasü.

Iba sentong nung VAS (PH), Dr. Vilitoli Y. Kiba menden liasü aser CVO Zunheboto, Dr. Meyatoshi Aier-i okila o jembia

aser kiset shirur kiburtem sentong nung adenba atema pelaba lemsatop aser kiset shiruru metsüba ajanga tajangzük anguba indang lemsatopa liasü.

Zunheboto district atema NVA tir o ya VAS Zunheboto, Dr. Vinoto H. Ayemi ajanga jembia liasü. Iba sentong nung azü 113 aser tanü asem nem Anti-Rabies Vaccine agüja liasü.

Maneni ak metsür nisung 90 shi nem de-worming tablets (Albendazole), multi-Vitamin powder amala angati lema agütsü.

### MOKOKCHUNG DISTRICT

Mokokchung District NVA unit ajanga World Veterinary Day ya CTC Campus, Aolijen nung munga liasü. Iba sentong nung FM, State Poultry Farm, Dr. Wapangsashi Walling menden liasü. CVO Mokokchung, Dr. B.M. Sunep ajanga sentong nung okila o jembia aser ano maneni DFO, Mokokchung Dr. Sentitula IFS aser Principal CTC Rev. Dr. A. Temjen Jamir nungertemia o tatsütsü jembia liasü. Sentong nung tepela ankep o ya FM, SCBF, Aliba, Dr. Nemjenyanger ajanga jembia.

### WOKHA DISTRICT

Wokha district nung World Veterinary Day 2021 ya Englan village nung munga liasü, kong EAC Englang Hq. Echungbemo Erui tetushi tesemdang ama dena liasü.

Iba sentong nung Dy. Director, Veterinary Hospital, Wokha, Dr. Hokato Yeputho menden liasü aser CVO Wokha, Dr. N. Thungben Yanthan ajanga okila o jembia.

COVID-19 agi timtem balala agütsüba mapang Veterinarian temi yaritepba osang tatsüka Dr. Yenben Kikon ajanga agütsü.

Echungbemo Erui-ia sentong nung o tatsüka jembia aser DDDO Wokha, Dr. E. Mhonlumi Lotha ajanga tepela ankep o jembia liasü.

Iba sentong agiba sülen anti-rabies vaccination sentong ka kasa tesem nung agia liasü.

### LONGLENG DISTRICT

Longleng NVA Unit ajanga World Veterinary Day 2021 ya Pongo Baptist Church den lungjemer Pongo village nung munga liasü.

World Veterinary Day

nüngtem nung sentong tongmelang ka agia yangji Pastor PBC menden liasü. Sentong nung Dr. Aoyimsen Jamir ajanga NVA tir indang salem osang zünga liasü aser World Veterinary Day ayongzüka atema arogo dang pelaba lemsatop.

Iba anogomung shilem tanabuba sentong nung atsü nung ak metsüba yimyatem aser ibaji ajanga rongsenketsüing nung tajangzük anguba indang training Dr. Aoyimsen Jamir aser chiyongsü agütsüba indang Dr. Lily Ngullie KVK Longleng ajanga agüja liasü.

Anogomung shilem tasembuba nung ak dak tashidak balala atemba indang nung ajemdaker agia Dr. L. Bongtok Phom aser Dr. Vilie Medoze nungertemi shisalen sayua liasü.

### TUENSANG DISTRICT

Tuensang district nung COVID-19 mechi tenokdangba balala agüja aliba ajanga sentong balaka ayongzüka magitet saka World Veterinary Day nüngtem nung azü 200 shi nem Anti rabies vaccine mozü agüja liasü.

### PEHK DISTRICT

Phek district nung 'paravets' temi mapa inyakba asoshi tepela temaitüsü parnok nem sempet agüja World Veterinary Day munga liasü, aser ASF tashidak poktetba indang nung sensaktem kaa liasü.

### PEREN DISTRICT

Peren district nung World Veterinary Day 2021 ya Ngwalwa town nung munga liasü. Iba anogomung nüngtem nung awareness sentong ka agi aser sentong nung adener nem hand sanitizers, face masks, vitamins, disinfectants amala lema agüja liasü.

### KIPHIRE DISTRICT

Kiphire district nung World Veterinary Day 2021 ya District Veterinary Hospital nung munga awareness programme ka agi aser angati anti-rabies vaccination agüja liasü.

### MON DISTRICT

Mon district NVA Unit ajanga World Veterinary Day 2021 ya DBS, Tizit, Mon nung azünger kaketshirtem den munga liasü. COVID-19 mechi tenokdangba balala benoka aliba yong iba sentong nung class IX aser X nung azünger kaketshirem kisung dena liasü.

## Nagaland nung Asia Music Festival summit ayongzüksü



Advisor to Chief Minister, Nagaland, Abu Metha-i o jembiba noksa nung angur.

**Dimapur, Rongchii/April 26 (TYO):** Acoustic Club, Wokha aser Task Force Music & Arts (TaFMA) lungjemer April 23-24, 2021 anogotem Doyang Tourist Resort Area, Wokha nung music festival munga liasü. "Doyang Rhythms, Music by the Lake" omen nung ajemdaker amungba benjong nungya Advisor to Chief Minister, Nagaland, Abu Metha tesemdang tongti ama dena liasü.

Iba benjongmung tenzüka sentong nung jembiba mapang, Acoustic Club, Wokha aser TaFMA lungjemer asangsang kuma sentong ayongzüka atema Abu Metha-i pelaba lemsatop aser tesem tajung ka nung sentong ayongzüker asünung küm ishika tsüngta iba kenten benjong ya tuluba kuma aintsü aser linük nung kenten benjong tongtipang ka akumtsü imlar, ta ashi.

"Nükla tajung lir, tesem jangratemtsü aser asenok ajaki kanga junga metet, asenok dak sempet aika lir," ta Metha-i ashi aser Acoustic Club aser Wokha district nung aliba lanurtem dang iba kenten benjong tali tuluba kumdahtsütsü ayongzüka liasü.

Kenten-menü wadang nung Nagaland nung sempet tajung aketer jenti lir aser TaFMA teyari nung state sorkari maparen balala inyaka sempet aketeritem

ajungsemotsü meranger, ta pai ashi.

Nagaland-i Konia nung mezüngbuba Asia Music Festival summit ayongzüksü, ta Metha-i ashi.

Iba sentong nung takoket nisungtem, shisalen sayur, kentener telok aser nungtugu kentener temi shilem agütsü, kong Asia kisung nungi masü saka continent balala nungi linük 20 dak tema iba sentong nung shilem agütsü, ta pai ashi.

Konia nung Asia Music Festival aliba mapang Naga nung ken tajungtiba sayutsü aser iba atema TaFMA ajanga Wokha nungi kentener tajungtiba shimtettsü, ta pai ashi.

Pai kentener dang meranga inyaks aser pei sempet tajungtiba nung amshia pei nükjiding ataloktsü ayongzüka liasü.

Iba ama sentong tajung ayongzüka atema TaFMA, Advisor, Theja Meru-ia Acoustic Club, Wokha aser Nagaland sorkar dang pelaba lemsatopa liasü aser tarutsü anogotem nung iba ama sentong ya Nagaland kübok district ajunga nung ayongzüka lanurtem nem maangka agütsütsü imlar, ta ashi.

Iba kenten benjong nung Wokha nungi kentener telok 15 den danga nungi jaokba telok kati shilem agir.

## Changtongya aser Tuli nung World Malaria Day mungogo



**Dimapur, Rongchii/April 26 (TYO):** Changtongya Town nunga "Reaching the Zero Malaria Target" omen nung ajemdaker April 26, 2021 nü World Malaria Day ya Dobashi Court nung munga liasü.

Iba sentong nung Medical Officer, C.H.C Changtongya, Dr Imtimongba ajanga ramen prokshia aoba aser nokdangtsü yimyatem rateta ashi.

Pai sentong nung adener dang teti merila aridokba mozü aser LLIM merila sü amshitsü ajungshi aser pei aliba temeket müreka ayutsü aser tzü atsingdaka aliba indoktsü ayongzüker, kechiaser iba amala tesem nung merila tali apoker, ta ashi.

Iba sentong nung SDO (C) Changtongya, Rorheu Peseyie aser All Ward Chairman Changtongya, Putinungba Jamir natia o tatsütsü jembia liasü. Sentong ya M.O (Ayush) C.H.C

Changtongya, Limasashi mendenpuba sür agia liasü.

Community Health Center, Tuli nunga World Malaria Day ya "Reaching the Zero Malaria Target" omen nung ajemdaker April 26, 2021 nü munga liasü.

Iba sentong nung shisalen sayur Dr. Joshua, Medical Officer, CHC Tuli ajanga World Malaria Day amungba temaitüsü aser nükjiding rateta shia liasü.

Pai sentong nung adener ajak dang pei kidangi orr kidanger aser medemertem den ramen nungi kumzüka alitsü indang awareness prokshitsü ajungshi aser lokti balala nungi lenirtemi maneni yaritepba atema pelaba lemsatopa liasü.

Iba sentong nung S.M.O C.H.C, Tuli, Dr. Imlinaro menden liasü aser sentong nung lokti balala lenir, ASHAs aser Malaria Surveillance Worker tem dena liasü.



# ONGC nung inyaker pur aoba atema police ka apu



ONGC nung mapa inyaker asem pur aoba ken o dak sendakba nung Hombarnü Upper Assam kübok Tinsukia district nung Assam police constable ka pur aoba noksa nung angur.

**Guwahati, April 26 (Agencies):** ONGC nung mapa inyaker asem pur aoba ken o dak sendakba nung Hombarnü Upper Assam kübok Tinsukia district nung Assam police constable ka puogo. Police constable ya Basanta Buragohain ta jangjaogo aser pa ya Sivasagar kübok 25th AP(ONGC) Branch nung inyaker. Buragohain ya Sadiya kübok Chapakhowa tesem nung alir. April 21, 2021 nü ONGC nung inyaker nisung asem samar külen nungi constable Buragohain ya mapai maru. Sadiya police-i pa apu aser pa dang asüngdangyadar. "ULFA (I) telok den tesendaktep lir aser külemi

inyaker ama temolung melemi bilemba atema onoki Basanta Buragohain puogo. Onoki pa dang asüngdangya tenzükogo," ta police-i metetdaksü. ULFA (I) telungpurtemi ONGC nung mapa inyaker nisung asem pur aoba rongnung nisung ana Hokolbarnü Nagaland kübok Mon district nungi Indian Army aser Assam Rifles longjemer kumzükogo. Parnoki kumzükur nisung anaji Alakesh Saikia aser Mohini Mohan Gogoi na lir. Sivasagar district nung Lakuwa area kübok Romonia workover RIG tesem nungi ULFA (I) telungpur temi ONGC nung inyaker asem ya ambulance ka nung pur anir ao. Kasa mapang, par asem

rongnung nisung tasembuba Ritul Saikia bushitsü atema security forces-i mapa inyakdar. ONGC nung inyaker nisung asem pur aoba ken o dak sendakba nung April 22, 2021 nü Sivasagar police-i nisung 14 pua liasü. Ano iba maparen nung Assam Police pungo densema lir ama temolung melemi bilemer. "Onoki iba ken o nung ajemdaker ano bushisüngdangdar aser iba maparen nung tanga police dena aliba indang nung kangarabo jembitsü makok. Nisung pur aoba ken o dena alir kar danga onoki metoktsütsü aser parnok ji putettsü," ta Assam Police-isa metetdaksü.

# Lunglei morok mi enseptsü atema IAF-i helicopter 2 agütsü

**Aizawl, April 26 (Agencies):** Mizoram sorkari teyari meshiba sülen Indian Air Force helicopter MI-17V5 kati morok mi azüokba maparen nung yariteper. IAF-i Bambi bucket aliba MI-17V5 helicopter ana agütsütsü ta PRO Shillong, Ministry of defense-i metetdaksü. Tesüiba ghonda 48 shi ka morok mi aoba manener aser tesem kar nungbo azüokaka aremlen mi ano meremsepteti lir. Iba lendong nung nisung asüba osangbo mali saka Bungtlang South nung ki 12 mitsü küma rongdokogo. Indian Army-ia district administration den yaritepa mi remseptüsü aser tangalen kaoloka meyoktsü atema meranger.

Honibar anepdang 7:00 ako meta Lunglei jila anasa arem nung morok mi adok aser tang Lunglei, Lawngtlai, Serchhip aser Hnahthial district tem nunga kongshiogo. Hombarnü Prime Minister Narendra Modi-ia Mizoram Chief Minister Zoramthanga den iba tebilemetsü khuret lemsatepogo aser Centre-i akokba tashi yaritsü ta nangzük. "Mizoram CM Zoramthanga den jembiogo aser morok mi indang osang metetpelaogo. Centre-i akokba tashi yaritsü nangzükogo. Mizoram nung alirtem ajak kumzükaga ayutsü atema sarasademtsür" ta PM Modi-i Twitter nung metetdaksü. Mizoram CM Zoramthanga-ia PM Modi dang pelaba metetdaksüogo.



Assam nungi mezüngbuba tetsür IAS ketdangsür Parul Debi Das Hombarnü COVID-19 ajanga asü. Guwahati nung aliba Apollo Hospitals nung la anepalu saka mekümzüketet. Parul ya Assam-Meghalaya cadre IAS ketdangsür ka liasü aser Assam nung Additional Chief Secretary inyaka lia mapa nungi anisüngsük. (Guwahati, April 26)

# GMCH nung oxygen plant asem amenok

**Guwahati, April 26 (Agencies):** Gauhati Medical College & Hospital (GMCH) nung oxygen plant asem amenokogo. Hombarnü Health minister Himanta Biswa Sarma-i iba osang ya Twitter nung sangoktsü. Minister Sarma-i ashiba agi, "Kamrup (Metro) district nung Covid-19 tashidak agi shiranger timtiba lir, iba tesem nung Covid-19 agi shirangertem atema mapang shitak nung oxygen agütsütsü asoshi item plant yagi

kanga nungittsü." Centre sorkar teyari agia item oxygen plant takok ngua amenokogo. Deobarnü Assam nung nisung 1844 dak Covid-19 aliba putet aser parnok rongnung Kamrup (Metro) nungi nisung 791 dena lir. Kasa anogo iba wara agi nisung 14 asü aser parnok züngsema Assam nung Covid-19 agi asür nisung 1,200 tashi kumogo. Tang state nung nisung 15,470 shi iba tashidak agi

shirangdar. Ano külen, oxygen agi metokmeperiba timtem pongbadaktsütsü atema Assam sorkari Bhutan nungi oxygen bener arutsü lenmang bushitepdar. Deobarnü, Health & Family Welfare Minister, Pijush Hazarika aser Rajya Sabha MP Biswajit Daimary nati Samdrup Jhankhar, Bhutan nung oxygen plant semdangogo. Iba plant maparen takok ngua inyaktetra anogo nung oxygen metric tonne 50 tashi yanglutsü.

# Sonitpur nung arasentsür ka zükset

**Guwahati, April 26 (Agencies):** Arasentsür maparen inyakba dak sendakba nung Assam kübok Sonitpur district nung arishi küm 53 tain amitsür ka taküm samaogo. Osang angazükba agi Rangapara area kübok No 1 Geruajuli tesem nung iba lendong atalok. Tetsürlaji Laksheswari Daimary liasü ta jangjaogo. Laksheswari ya tanur pezü tetsü ka liasü aser Deobarnü la tasü mangji arem ka nung remer aliba ngutet. La ya Honibar aonung tepset. "Honibar aonung 11:00 meta telok ka Laksheswari Daimary'er ki nungpoka atu aser parnoki la azükset," ta osang ajanga metetdaksü. Parnoki la züksetba den külemi la tasü mang ya bener orr iba yimtsüng nungi kilometer 1 shi pilar aliba arem ka nung rema yutsü. Iba telok jagi ano Laksheswari Daimary'er

semchir Mohit Daimary tepsettsü merang. Deobar anepdang iba tesem nung alirtemi Mohit Daimary teka aser tetsüng alener aliba angu. Mohit kumzükba sülen parnoki Honibarnü aonung atalokba lendong indang osang metet. Parnoki police nem osang sangoktsü aser yimertem teyari agia arem nung tetsürla tasü mang remer aliba angu. Laksheswari tasü mang tutetba mapang Chariduar revenue circle indang circle officer, Aditi Goi dena liasü. "Lai arasenba mapa beshir ta temolung melemi bilema la ya tepset, kechiyong taoba nunga temolung melemi bilemer telok kari la amokmerena liasü" ta lar kidangertemi kuli agütsü. Laksheswari tepsetertem ajak pua temerenshi tapet agütsütsü asoshi yimertemi takhangba agütsüogo.

**GOVERNMENT OF NAGALAND**  
**DIRECTORATE OF YOUTH RESOURCES AND SPORTS**  
**NAGALAND: KOHIMA**

**NO.DYRS-SPORTS-KISCE(Manpower)/14/2020/ Dated, Kohima the \_\_\_\_ April 2021.**

**ADVERTISEMENT**

Applications are invited to the following posts for Khelo India State Centre of Excellence (KISCE) at Indira Gandhi Stadium, Kohima for a period of 4(four) years under the Youth Resources and Sports Department, Nagaland, Kohima.

Sl.No.	Place of posting	Designation	Number of post	Salary
1	2	3	4	5
1.	KISCE, Kohima	Masseur	1	Rs. 35,000/-p.m. As per SAI hiring norms
2.	KISCE, Kohima	High performance Manager	1	Rs. 1,00,000-1,50,000/-p.m. As per SAI hiring norms

**Eligible candidates may download details from the following link.**

- Nagaland.gov.in
- dyrs.nagaland.gov.in /www.dyrs.com

Filled in forms may be submitted at KISCEKOHIMA@gmail.com on or before the 5th of May 2021 at 4:00 p.m.

**(AKUMLA CHUBA), NCS**  
**DIRECTOR**

*Issued by DIPR*





# TIR YIMYIM

## YIMOBILEM (EDITORIAL)

DIMAPUR TENTONÜ, RONGCHII (APRIL) 26, 2021

### Lockdown maginer

**N**isungtem pei onüleni moudaktsüi ozüing agi nokdanga ayuba dang English agi lockdown ta ajar. Atangji, yimteni nübortem kechalenia moudaktsüi pei yimtak aser pei kidang shibanga ayuba nükjidongji temerenshi agütsürba masü saka nübortem lendongi meidaktsüsü asoshi inyakba sentong ka lir. Ajsüaka, yaküm 2020 küm ama, ita junga nübortem kechalenia moudaktsüi nokdanga ajanga rongsenren nungbo kanga akoksar. Aji oda, alima nung ya takartem dang nungibo tanü poksüing aa alirtem teimba, anungji kenü ayangi mao nung chiyongtsü maka timtem ajurutsüba kibong aika lir. Atangji, iba tiaji meteta yimtenia jangotsü teyari agütsür, saka anogo kwika agütsütettsü ? Ano, shinga kechalenia moudaktsüi nokdang asünungji, aluyimertema alui maor, anungji tang chiyongtsü makaba dang masü saka sangkümba yawara arutsü. Ano, lockdown ajanga takar aser makar ajak kasasa timtem aser takoksa ajuruba kaji, tanü putu nungbo aluyimertem dang nungibo industry tapu balala lapoka nisungtem nungdak yanglua agütsürtem teimba lir. Ajsüaka, lockdown asüba agi industry-tema shibangtsüsa akümer, anungji inyakertema menüngdaker. Iba jagi industry kiburtema, kecha meyaglur asünungji, kanga tuluka akoksar aser inyakertema mapa nungi anentsür asünungji mapaa maka aser chiyongtsü maka ta timtem tulu ajurur. Atangji, yimten yimsüsürtemia item ajakji meteta lir, saka nübortem taküm dang kümzükra ojang ta asüba tangtetba nung inyaker. Nisunger yimya agi tashidak wara tamajung aliyonga, rongsen agibo tenük masünger asünungji kaa itta aliyonga odang maneni inyakner aser ano karbo mapai moura chiyongtsü makatsü asünungji, tashidak wara liang teli, mapaibo aotsüsa akümer. Iba amaji, kari menokdangra, rongsen aser mapa arishidang tang ama menatepa aoba Covid-9 tashidak ya mapa inyakertem rongnung kanga karaa menatepayonga aoer. Iba jagi lockdown asütsüsa akümer. Anungji, lockdown mesüdaktsünüra senso shiai tashidak wara nokdangtsü atema yimteni teinyaktsü teyubatem ajak shitak benshitsüla. Asenoka lockdown asüba agi komaka kongshir ta tebilemba aser tangatetba metettsü atema, taoba hopta nung iba osangkaket ajanga " Covid-19 wara nokdangtsü atema yaküm 2020 küm ama, ita junga lockdown asünunga koma süla ?" ta asüba tasüngdangba onük nung shisalemsatepogo. Aji oda, iba onük nung shisalemsateper ajaki lockdown masütsüla ta asüba tebilemba lemsatepogo. Aji shitak lir, kechiyong küm ana ashiasia linük nung shinga kecha meinyak shibanga ayu nung, kechi chiyongtsü ? Aji oda, lockdown asü shia jangotsü aser osettsüset nungbo jenjang atutsü aser nübortembo tesensakba akümstsü. Iba tiaji reprangteta, yimteni lockdown-bo masütsü saka tashidakbo menatepa maotsüsa tazüokba ka kübok nübortem pei pei mapabosa inyaktsüsa sentong atongtetra, iba jagi tashidaka memena aser mapaa manen ta takoksa balaka majurui tashidak wara den takok ngua raratettsü. Atangji, tanü tashi nung asen lima nungbo Covid-19 tashidak wara yagi kodamasü shirangbabo aika mali aser tasüa aikabo masü, iba jagi asenoki züzüa bilemer aser asenok aikati tamanga mamanger, saka asenoki amangtsüsa asenok dak tashidak agi atongdangbo lockdown asütsüa menur asütsü. Tashidak aser timtem nungi jenbuttsü mesüra paidoktsübaji tonger masü matongdang inyaktsüla, anungji asenok dak Covid-19 tashidak agi matongtsüsa, lockdown masüyonga, asenoksasa asenoki timtem terabo agia kümdanga alitsüba mapangji tang ya lir.

## OLEMSABANG

### NABOT LUNG AGI ONSETA SÜDAKTSÜBA AMA DELHI NUNG ALUYIMERI AJURUR

~ Wati Longchar, Serampore

(Yashi adok nungi...)

#### Nabot ya shiba?

Nabot ya Yerzeel nunger lisopur ka. Yerzeel lenden ali temo lima ka asü nung, nübortem Yerzeel dang "Ali temo keta Tsüngremi yanglujangma" (May God make fertile)" aser tsünüsempongtsü onsara junga züsented nung "Tsüngremi metsü yoktsü" (God will sow) ta aja (Hos. 1:4;2:24 den medemdangang). Nisung shirnok iba Yerzeel lendenlen alu aka, parnokji temoatsü ta züingshi. Tetsü-tebou nungi senmang anguba tsükmenatzü lu ka Nabot-a Ahab-er ki anasa liasü. Temo aliba lu asü nungji tsükmenatzü jendi züsented aser iba züsentedba nungjagi kibong mesüa liasü. Iba tsükmenatzü luji pa meyong dangbo masü, kidong ajak meyong. Tetsü-tebou nungi aruba senmang, par chir nem iba senmangji yutsütsüla. Tetsü-tebou senmang, talisa alu/ali tangar dang mayoker. Ali akaba ajanga kidong, kin ka ta aser yimden yimli ka yangerteter. Ali makara nisung kaji aener kümadoker and ayak samar. Yihuda nunger ozüing nung ali mayoktsüla ta züluba liasü. "Nenoki ali teti asoshi mayoktsüla, kechiaser aji nenok meyong masü, saka Tsüngrem meyong lir, nenok kü den aener aser semloka alirtem dang lir." (Levi 25: 23) Yihuda nungeri teyanglur Tsüngrem dang atangji kibur, meimchir ya kibur masü, aener ka ama dang aser Tsüngrem meyong ali ayoktsü makok ta sayur; kiliri kibur li ayoktsü makok. Tetsü-tebou senmang ayoktsü memelar aser Kibuba meyong ayoktsü makok ta ochi o Naboti chuba dang tasü ita indang indanga dang Tsüngrem tenünga tetshia "Kübu senmang ne nem agütsütsüji KIBUBAi nungtemer" ta ashi anungji pa lung agi onseta südaktsü. Delhi nung aluyimertem takhangba kaji Corporate ajanga masü, agent balala ajanga masü, saka ali dak apet tsünüsempongtsü balala meidaktsütsü aser iba süngjang kecha tenokdangba makai ayoktsü temeten tashiji bener moudaktsüner ta noktaker. Ali mechi kiyonger den, adianu tsüingda, mangatetep aika lir. Nisung aika tepsetba otsü azünger. Tanüa ochi nung tekong meranga noktakra tepseta endoktsü. Ochishir tepseta endok nung dang rongsen rakzüka agiteter. Delhi aser India yimti balala nung aluyimer shirnoki pei lu kümzüka ayutsü longkak aiter, parnok 214 shi süogo. Ano Nabot ama südaktsütsü.

#### Ahab chuba ya shiba?

Nükmerem agi sünga aliba chuba ka. Pa merumeru aser kechaia tenük masüngba nisung ka. Naboter tsükmenatzü lua nükshi, kechiaser Yerzeel lenden nung aluji liasü. Chuba asü nungji "tsükmenatzü luji kü nem kua" ta ozüing dang agütsü, saka Nabot sensaker ka dang süaka magütsütsü ta ashi. Aji Chuba asoshi maksü tulu liasü. Ano yimsüsür aser obendang agütsür ka asü nungji, aser ozüing ajak metetba chuba ka asü nung tashiyim agi pai aliji merakzükter kechiaser aji Yihuda nunger ozüing agi memela. Pai metet, tetsü-tebou senmang anguba ali mayoker; Tsüngrem dang ajak madak kibur anungji ali kodanga teti asoshi mayoker ta metet. Saka pa nükmerem, merumeru agi kokdakjadok nungji ozüing belepsa inyakba nisung ka. Chuba tamajung ka. Pai Nabot dang ner Tsükmenatzü tsüki ozü ki anasa anungji ni atsüki yanglutsüba kü nem agüjang mesüra ni temelen ali tesem balaka nung agütsüdi, yamaji mesünera ni sen talang agi alidi ta ashi. Nabot-i Kibubai memelar ta langzü. Tanü company balalai aluyimtsü jaka tajung ayoktsü ajungshir, ali yokdaktsütsü Government ajuoktsür ozüing yanglur, sen dalang agütsütsü, ner chir mapa nung anioktsü, ta nangzüker saka yamaji meinyaker. West Bengal nung TATA company-i Singur nung yamaji inyakba ajanga Didi Mamata-i anir longkak aita noktakra ajanga shibangtsüsa aküm. Delhi nung longkak aiter aluyimeri dang masü, nütüing ajaki company balala mesüra Cooperate balalai parnok tajangzük asoshi dang inyaktsü aser nübör ashiooktsütsü ta meteta lir. Cooperate balalai nübör ashiooktsübaji alima ajak nung otsü tejangja kar, kechiba süra parnok nükjidongji tajangzük lir.

#### Yezebel ya shiba?


Ahab chuba kinungtsü. Tebuba dang yamai merumeru tesü; ya tai, aluyimer, sensaker dang meima benshiang ta meshitetba kinungtsü ka. Meyiper na Israel yimli nung chuba masüa ama ta asüngdang? Tetezü, na chuba anungji nai kechi inyaker aji inyaktsü akok; nai kechi aginer agitsü tashi kar ta ajungshiba. Yimsüsür aser tuluri kechi inyakner inyaktsü akok ta angatetba tetsür ka. Anungji Naboter tsükmenatzü lu rakzüker tebuba meyong kümdaktsütsü asoshi chuba tenüing nung shiti zülü, seal ajenloker yok. Shitakba agibo tangar tenüing nung shiti züluba aser ozüing agütsütsübaji memelar; criminal mapa aser jail nung taküm piyong puoka ayutsüba nisung. Lumitsü anogo (tetezü tamang ajanga metendaktsütsü merangba) ka ayongtsü aser idangji Naboti Tsüngrem anema aser chuba anema jembiogo ta kuli agütsütsü nisung ana shimang ta tamburtem dang ashi. Kechiaser chubaji Tsüngrem den tatong asü nung shingaia pa anema mejembitsüla aser tashi angatsüla. Saka Naboti chubai ashiba manga. Nisung ka lung agi onseta endoktsü asoshi nisung anati kuli agütsütsü nungdak. Lenjem nung nübortem tsübudaktsütsü asoshi chuba aser Tsüngrem anema jembi onseta endok. Tamangbai metendaktsüra nübortem tejayshi ola madoktsü aser shilem agitsü, anungji lumiba anogo nung Tsüngrem aser chuba anema jembi ta aitsü. Lokti ozüing melaba ta, mojing mapa ta, tamangbai temeten ngudakja Nabot tepset aser aluji rakzük. Yezebeli ashiba ama na minister ato, na MLA ato, na officer ato kechi arendaker, süang, agiang, auüyang ta ajungshir onsara. Media balala ajak Cooperatei sen agi züp ta arakmoka yur, aluyimer anema jembi. Politicians, actors, lawyer, tulur aika Governmenti inyakba metenja jembi nguogo. Aija jembi tembo jail nung lir. Tamangbai temeten bushia PM Modi-a Sikh nunger tenlakidang oa külema sayuba nguogo. Covid-19 wara mapang longkak aittsü memelatsü aser tasü maitsü ta bilema PM Modi aniba Govt.i yaküm September nung iba temzüing yangluogo. Kechiba yamai ariteper ta temulung malem o aika shia osang zülur karibo zülüogo.

(Maneni asüing adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir**



# Tsiemekhuma nung Nagaland Prayer Centre Church semzükogo



April 25, 2021 nü Tsiemekhuma nung aliba Nagaland Prayer Centre Arogo semzükba sentong nung Rev. Dr. D.L. Sanchu-i jembiba noksa nung angur.

## Kohima, Rongchii/April 26

(TYO): Amongnü (April 25, 2021) Kohima district kübok Botsa anasa Tsiemekhuma nung Apostolic Ministries Tir, Rev. Dr. D.L. Sanchu-i Nagaland Prayer Centre Arogo sarasadem semzüksüogo.

Iba sentong nung jembidang Rev. Dr. Sanchu-i, kenü anogo nungbo Nagaland Prayer Centre ya "sarasaemba yimti" ka akümtsü imlar, ta ashi.

Paisa, Nagaland Prayer Centre nung Yisu Khrista tanela ajanga Naga yimtenren telok ajak longjemtsü aser Arogo denominations balala ajak longjemtsü atema sarasademtsü, iba denji külemi Naga linük nung alir ajak asoshi sarasademtsü, kechiyong Naga nung atema Tsüngrem nükjidong ka lir, ta metetdaksü.

Rev. Dr. Sanchu-i, "Naga nung kibong teraksa atema tatemsabo telangzübaji Yisu Khrista ajanga dang angutsü. Iba denji külemi Nagaland Prayer Centre-i maneni tang coronavirus wara nungi asenok ajak kumzüka alitsü atema sarasademtsü aser Naga nung dang masü saka alima tesem balala ajak nung Yisu Khrista tenyaba wadang tulutiba atangji ataloktsü atema

sarasademtsü," ta metetdaksü.

'House of Prayer for all Nations' ta nungja jaloktsüba dak sendakba nung Nagaland Prayer Centre (NPC)-i, "Nagaland Prayer Centre ya Tsüngremi tanela sempet aketer aika den mangdang ajanga jembiba nung ajemdaker amenoker," ta metetdaksü.

Paisa, "Nagaland Prayer Centre ya nisung ajak asoshi tanela agi asüngba Prayer Centre ka asütsü, aser mapang shia Naga nung sarasadem walunirtem iba Centre nung adenshir tongtibang onük pongu atema sarasademtsü; Naga nung tai temenen nangzüka tatok meshitsü (Neh. 9:2, 1. Sam.7:6), asen lima nung temenen aridoktsü (Mark 16:15-18), Nagaland nung alirtem atema sarasademtsü (Isaia 62:6, Yoel 2:12-14), Yirusalem nung yimjung alitsü atema sarasademtsü (Tenüngsang Ken 122:6) aser linüktem atema sarasademtsü (Mark 11:17, Tenüngsang Ken 86:9, Isaia 2:2), süra Tsüngremi asen lima aneptsütsü (2 Putipuyang 7:14) aser Pa tenangzüka ataloktsü (Hagai 2:6-9)," ta metetdaksü.

Sarasademdaksünertemi phone number 9612278351

ajanga tongteprateptsü akok.

Prayer Centre semzükba sentong nungsa jembidang Keviso Sogotsu-i, Nagaland Prayer Centre ya ajak atema lir, ta shia denominations balala nungi ajak dang Nagaland tajungba akümtsü aser azükarutsü atema iba Centre-i arua sarasademtsü mepishia metetdaksü.

"Iba Arogo nungitang, aser pei Arogo ama bilema ajak atema iba Centre ya temoatsü anguba Centre ka kumdakjang," ta paisa ayongzüük.

Sentong nungsa Director & Founder IMTI Sovima, Dr. Kip Rio-ia o tatsüka jembia liasü.

Sentong tetenzüklen Seiyhama CRC Pastor, Neizole-i Nagaland Prayer Centre meshiteta sarasademtsü.

Sentong nungsa Lazami Baptist Arogo, Seiyhama CRC aser Sendenyu Baptist Arogo nungi women prayer group-i ken balala tena liasü.

Iba sentong ya Nagaland Prayer Centre Pastor, Pfutsovi Metha leniba nung agi aser Keviso Metha-i tepela anküp o jembia.

Dr. Ruokuolhou Angami'er kibongi iba sentong atema sponsor süa liasü.

# ANO GO ABEN TSÜNGREM DEN

## Tamang agi tenük lapok

"Aser kodang pa kidangi ait, nükpokertemji pa dangi aru. Aser Yisui parnok dang ashi, "Ni ya inyaktettsü ta nenoki amanger asü?" parnoki pa dang ashi, "Hau Kibuba". Mat. 9:28

1998 ABAM sentong ka akaba mapang adianu Watiba ta sür nükpoker ka arua lokti tekülem mapang nung pai ni iba lima nung tenük tapok taküm ka süaka Tsüngremi pa meshimetsür mekükdaktsü, pa nungdak ajak nung Tsüngremi teti yarir, anungji ni meshimetsür masü ta leplepa shir, pai ken ka "iba lima nung ni tenük tapok, alima tobur tajung menguaka saka nükpokertemi khenü angutsü, kumtetba ajurur Yerusalem nungji lokti jakdang nokdaker adendang ajak tokolak anguma lur ola madoki nüktzü yima pai atenba ken angaba yimdangi arua bilemteter. Asen Kibuba Yisui alima nung taneptsüba jenti inyakba rongnung nükpoker nisung jenti tenük lapokja aneptsüba osangtajung kakettem nung angur, aser item ajak nungji parnoki pei tenük agi Yisuji nuguaka par tamang agi Pa dak amanga ranglok nungji adangji parnok shih aser tanela anaprongla tenükji lapok. Adianutem, asen adianu Watiba daka iba kasa tamangji akaba asenoki pa taküm kuli ajanga angateter. Na ashiko shih tenük jagibo alima tobur tajungji nguaya alitsü, saka kotak tobur ajungji mengutettsüsa nükpok tia nung ali asü? Nai khen shisadangang.

### Sarasadem

Kibuba Yisu Ne dak amangba nungi kü taküm nükpok tia nungi nüchi taküm dangi anir ta ni metet. Iba tamang nung alitsü Nai ni yariangma ta sarasademer. Amen

# Pakistan nung tensa raksaba sülen Khristantemi shisabulur

**April 26, 2021:** Tang Pakistan nung yimtenren tensa majungba agi Khristantem ano taliba reshikangshitsüa akok, ta Pakistan nung Khristantemi tsübua bilemer, ta International Christian Concern (ICC) osang ajanga metetdaksü.

Tehreek-e-Labbaik Pakistan (TLP) züngsemtemi tamangba yimsü nung ajemdaker longkak aitba ajanga Khristantemi takoksa angutsü, ta Khristantemi bilemer.

Pakistan sorkari TLP party tentetsang aser party lenir, Khadim Hussain Rizvi apuba sülen TLP pusemertemi yimti yimdong nung adenshia longkak ait.

TLP-i Tsüngrem mezüngmeshiba ken o nung tai tonglokja alirtembo ajak nem tasüba temerenshi agütsütsü akhangba den külemi France nung ketdangser kari jembiba o ajanga Tsüngrem mezüngmeshiogo, ta shia TLP-i sorkar dang linük nungi French ambassador mindoktsü atema akhanger.

Ajisüaka sorkari TLP-i akhangba magizükba anema Rizvi-i longkak aittsü, ta amokmerenba sülen sorkar ketdangsertemi Rizvi apu aser ozüng ajanga TLP telok nokdanga liasü.

Sorkari Rizvi apuba sülen

Pakistan linük tesem ajaklen longkak aitba mapang nung police aser TLP pusemertem tsüngda anogo aika rara.

Anogo aika rara adokba sülen tesüsa Pakistan sorkari Rizvi chiok aser Pakistan nung aliba French diplomatic mission agientsü atema bangzüng ka renemogo.

Voice of the Martyrs telok nungi Todd Nettleton-i ashiba agi, French diplomatic mission agientsü atema inyakba dak sendakba nung Pakistan nung Khristantemi timtem kanga ajurutsüa akok.

Osangbener den jembidang Nettleton-i, "Khristantem anema inyaksüa akok. Pakistan nung Khristantem atema tebilemtsü tulu rongnung kaji- Khristan yimsü ya anüolen aliba linüktem indang yimsü ama bilemer," ta metetdaksü.

Tang tashi nungbo Pakistan nung tensa majungba dak sendakba nung Khristantem anema inyakba tatalokba kecha mali, ajisüaka tarutsü nung Khristantem anema inyaksüa akok, ta Khristantemi bilemer.

Iba dak sendakba nung Nettleton-i alima tesem ajaklen Khristantem dang Pakistan nung Khristantem atema sarasademdaksünertemi mepishia metetdaksü.



Mangkolemba Baptist Arogo Women Ministry ajanga Sisterly Care sentong ka April 24-25, 2021 anogotem Mangkolemba Baptist Arogo nung Bolen Baptist Arogotsür aser Longjemdang Baptist Arogotsür atema ayongzüka katsü.



**OLONG PAITEP # 5794**

	1		2							3
4					5		6			
7										
			8							9
10									11	
								12		
13									14	
15										

**TIPILEN**

- 1. Taochi sayuba - 10
- 4. Temezüng agi kongshi - 4
- 5. Ainer - 6
- 7. Chiyungnü - 3
- 8. Mi nung atsük - 5
- 11. Asen masü - 3
- 13. Lenmang ajurutepdak - 6
- 14. Yangi masü - 4
- 15. \_\_\_\_\_ jang - 6

**LANGTSÜNGLEN**

- 1. Menungra - 6
- 2. Mi tsükloker mesepba - 4
- 3. Süngo o tzü ajemba - 5
- 5. Temenemsü tajung - 7
- 6. Idak - 4
- 8. \_\_\_\_\_ ok - 4
- 9. Tebangi apuba kongki tapu ka - 6
- 10. Tashi endokba metet - 5
- 12. Tzü manung senzüba - 4

**OLONG PAITEP # 5793 TELANGZÜBA**

**TIPILEN :**

- 1. Rebeka, 4. Adam, 6. Yohan,
- 9. Zü, 12. Sayutsünger, 15. Ku,
- 16. Naman, 17. Abel, 18. Samuel.

**LANGTSÜNGLEN :**

- 2. Kan, 3. IM, 5. Anüng, 7. Amsü,
- 8. Yosep, 10. Sara, 11. Isak, 13. Yakob,
- 14. Nana, 16. Noa, 17. Am.



**AROGO TASHI AITTSÜ ATEMA SHISATOKDEN AKAR**

**Onir** : Ohoooo...Arogo tashi ita aotsü atema iba shisatokden ya ayongzükogo... Anungji ajaki pei pei tangatetba shilem agia jembitsü okila-a toktsür.

**Nutsüng-1:** Nia kü tebilemba ka shidangdi...Küm ka nung Deobar ajak agi tenem-sür pungo shi adoker... Deobar ka-ana dak alaka tanungba ajak nung envelope lema tenla sarur...Anungji tenla saruba ya tera-ka ajem nung koda...??? Joko ni ama sensakerbo oda tamangang mamangshili ta asütsüsa kümogo.

**Nutsüng-2** : Nia kü bilemba ka shidi...Envelope lema tenla sarudang kechi sudir suaka ajaki agütsütsüla... tazüng asüyonga bener arung tabo mashi tajungba...Ni ama sensakerbo tenla seper agütsütsü makaba agi sentepi arunuaka marur... saru molok sura khangtepa sarur...saka tenla yabo temulunger tenla tang.

**Nutsüng-3:** Nia o ka shidangdi...Alima lokti-tentet nungbo...telok-telok lemsatsü akok... saka arogo nungbo kecha telemsa malitsüla.... alima lokti-bo temzüng-ozüng agi anir...saka arogo-bo temeim aser taochi agi anir....arogo ya arok tamang tenla...arok tershilem...arok nubutsük agi taküm alir...arogo nungbo tanak - temesung mebendangtsüla...züngsem ajunga kasasa züngshitsüla.

**Onir** : Haaauu---niiiiiii...Tang nungi danga yamaji alitsü/anitsü meranglabaaaaaaaa.

Lilir : L.Kika Pongener.

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Bendang**

\* (n) pei alidak masü tanga lima nung ( foreign land) Pa tangar lima nung asoba agi **Bendang** ta jatsü.

**Bendang**

(v) Okadak ken o telemtetba agütsü / raratepa lia anendaktsü ( Judgement/ intervene)

\* Obendangeri ken o **bendang**. An tepong ana mechitepa lia pai orr bendang.



Tir Yimyim

**NAI-A YA METETTER MA?**

**TANG ASAYA ALIBA 'IPL 2021' NUNG WICKET TIMTIBA AGIR BOWLER KAR:**

- 1. Harshal Patel (Royal Challengers Bangalore) 15 wkts
- 2. Avesh Khan (Delhi Capitals) 11 wkts
- 3. Rahul Chahar (Mumbai Indians) 9 wkts
- 4. Chris Morris (Rajasthan Royals) 9 wkts
- 5. Deepak Chahar (Chennai Super Kings) 8 wkts

**TANÜBO NAI LANGZÜANG**

Q. World Earth Day ya \_\_\_\_\_ küm mezüng munga liasü.

- A.1970 B.1972 C.1975 D.1980

\_\_\_\_\_ (Taruba adok nung onoki langzüksü)

**YASHI ADOK TELANGZÜBA: 2015**

**SUDOKU # 5837**

5	6			2			4	
8	3	7		1				
2		1		6	9		3	
	9						2	5
6	8	2		5	1			
	7		8		2	1		9
3				7	4		8	
	2	4	5			3	1	
7		8	2	9	3			

**TELANGZUBA # 5836**

1	5	4	6	9	2	3	7	8
7	2	3	1	5	8	6	9	4
9	8	6	7	3	4	1	5	2
2	4	7	5	1	6	9	8	3
8	6	9	3	2	7	4	1	5
5	3	1	8	4	9	7	2	6
3	7	2	9	6	5	8	4	1
4	1	8	2	7	3	5	6	9
6	9	5	4	8	1	2	3	7

**OJANG LUTEP # 5380**

- GPMONU :
- TJEETEMN :
- NGNU :
- MEJANGTSÜH :
- ITASHK :
- OKBPRA :
- NGAAJA :
- GJANSÜNG :
- NGTAJU :
- NGTSTAÜR :

**OJANG LUTEP TELANGZÜBA # 5379**

**TIMTEM MAGII TAKOK DANG AGINÜA INYAKBA SHISATSÜ KHENYONGI INDOKTSÜ MERANGANG**

**TAN HOPTA ATEMA - KOMA SÜLA ?**

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study ( Lai bushiba mapang) sentong ka tenzük nunga koma süla ?





Lucknow, April 26, 2021: Hombarnü Lucknow nung Oxygen filling centre ka nung coronavirus tashidak agi shiranger kinüngertem cylinders nung medical oxygen inoktsü atema atatepba noksa nung angur.

**MENUNGRA BILEMTETER**



**Asür Tsüktitula Lkr**  
Changtongya (27.04.2020)

Nai onok doktsür tanü agi küm ka abensar, saka onoki ne temeim aser sarasadem teti bilemteter.

~ Temeim Chirnurtem & Kinungertem.

### Covid prokshibaya Election Commission tai ajanga lir: Court

**Chennai, April 26 (Agencies):** India nung ano nisung lakh 3.5 dak coronavirus tashidak putetba anogo nung Madras High Court-i, tang linük nung ano tanaben iba wara prokshiba ya Election Commission tai ajanga lir, ta metetdaksü.

Madras High Court-i, EC-i linük nung election nüboyim sentongtem agitsü temelaba agütsüba agi coronavirus wara tanaben prokshio, anungji nisung tepsetba atema EC ketdangsertem anema ken o benoktsüla, ta metetdaksü.

Chief Justice Sanjib Banerjee aser Justice Senthilkumar Ramamoorthy nati akümba bench-i, "EC ya khuret khenyongi mabenba institution ka lir," ta metetdaksü. "Coronavirus tanaben

prokba ya ner institution tai ajanga lir," ta Banerjee-i Election Commission indang counsel dang ashi.

Paisa, "Nenok ketdangsertem anema nisung tepsetba ken o benoktsüla," ta ashi.

"Election nüboyim lokti senden balala agiba mapang nung nenok tanga lima nung liasü asü?" ta shia Banerjee-i, Election Commission-i Covid anema telatetbatem shidak mebenok; court-i aiben tetuyuba agütsüyonga election sentongtem nung mask magi, sanitizers mamshi aser nisung tsüngda tetsüngda itta maliasü, ta metetdaksü.

Court-isa EC dang, coronavirus anema telatetbatem shidak beshitsü atema asalentong ka

meyanglura May 2 nü election votes azüngtsü atema memelatsü, ta metetdaksü.

"Tang tensa ya taküm alitsü aser kümzüka alitsü tensa ka lir. Iba sülenji ang tanga inyaktsü," ta Chief Justice-isa metetdaksü.

May 2 nü Karur nung Covid anema telatetbatem shidak beshia vote azüngtsü atema Election ketdangsertem dang tuyutsüla, ta temepishiba ka agütsüba ken o angadanga mapang nung court-i EC dang item tekümdangtsütem beshitsü tuyua liasü.

Covid tensa nung ajemdaker TMC tongti, Mamata Banerjee-ibo West Bengal nung tanüngba election shilem asemprong anogo ka nung dang agitsü mepishia liasü saka EC-i magizük.

### West Bengal election shilem 7buba nung voters 75%-i vote agütsü

**Kolkata, April 26 (Agencies):** Hombarnü West Bengal nung assembly elections shilem tenetbuba nung voters shilem 75.06-i vote agütsüogo.

Hombarnep Ato kilonser, Narendra Modi-i nüburtem dang pei senti vote agüjang aser coronavirus wara anema tetuyuba balala beshiang, ta metetdakja liasü.

Hombarnü Murshidabad, Paschim Bardhaman, Dakshin Dinajpur, Malda aser Kolkata district tem nung assembly menden 34 atema polling station 12,068 nung vote agütsü.

Election shilem 7buba nung tetsür 37 densema candidates ajak agi 268-i toktepogo.

Anepdang 7:00 ako nungi polling tenzük aser nikongdang 7:00 ako nung polling tembanga liasü, ta Election Commission-i

metetdaksü.

West Bengal nung election sentong sangdongba mapang nungi tenzüka tang tashi nung sen crore 332.94 puogo aser tanü tashi nung election agiba states/UT 5 nung sen crore 1,035.54 puogo, ta Election Commission-i metetdaksü.

Ballygunge assembly constituency nungbo bomb 15 nguteta bomb squad-i raksaa indok. Osang ka lazükba nung ajemdaker Hooghly Jute Mill Colony nung yangkhu ana nung crude bomb 19 angu aser Malda district nung nisung ana ket nungi prangpong asem apu, ta election ketdangsertemisa metetdaksü.

West Bengal nung assembly election shilem 8 lemsar agir; April 29 nü election tembangtsü aser May 2 nü vote zünga election osang sangdongtsü.

### India nung ano Covid case lakh 3.5 putet; Covid case million 17 jungogo

**New Delhi, Rongchii/April 26 (Agencies):** India nung ano nisung lakh 3.5 tema dak coronavirus putetba sülen tang tashi nung linük nung coronavirus caseload ajak agibo million 17 jungogo.

Tesüiba ghonda 24 tsüngda India nung ano nisung 3,52,991 dak coronavirus putet aser kasa mapang nungsa iba tashidak agi shiranger 2,812 süogo, ta Hombarnep Union health ministry data ajanga metetdaksü.

Tang tashi nung India nung coronavirus caseload ajak agi 1,73,13,163 jungogo aser iba tashidak agi teshirangdakpur lakh 28 dak tema lir.

Taküm February 12 nübo iba tashidak agi teshirangdakpur lakh 1 dak tema dang liasü saka tangbo teshirangdakpur lakh 28 dak tema kümogo.

Tang tashi nung linük nung iba tashidak agi nisung 1,95,123 süogo, nisung 1,43,04,382 anepogo aser iba tashidak agi shiranger asüba shilembo 1.13 dang kümogo.

Tesüiba ghonda 24 tsüngda coronavirus tashidak agi asür 2,812 nungji Maharashtra nung 832 asüba, Delhi nung 350, Uttar Pradesh nung 206,

Chhattisgarh nung 199, Gujarat nung 157, Karnataka nung 143 aser Jharkhand nung 103 asüba densema lir.

India nung coronavirus tashidak agi nisung timba asüba state ji Maharashtra (64,760) lir, iba sülen Karnataka (14,426), Delhi (14,248), Tamil Nadu (13,557), Uttar Pradesh (11,165), West Bengal (10,941) Punjab (8,432) aser Andhra Pradesh (7,685) state tem lir.

Hombar tashi nung India nung nisung 14,19,11,223 nem covid vaccine agütsüogo.

India nung anogo tenet tsüngda (April 18 nungi April 25 tashi) nisung lakh 22.49 dak coronavirus puteta liasü. Alima nung iba wara prok tenzüker hopta ka tsüngda nisung timtiba dak coronavirus putetba linükji India kümogo.

April 12 nungi April 18 tashi nung linük nung coronavirus agi nisung 8,588 asü, aser iba denji medemdanga April 19-25 tashi nungbo anasü agi tali (16,257) süogo.

Hombarnep ICMR-i, April 25 tashi nung samples ajak agi 27,93,21,177 tendangogo aser iba nungji Amongnü samples 14,02,367 tendangba densema lir, ta metetdaksü.

### Nisung ajak nem Covid vaccine angati agütsütsüla: Rahul Gandhi

**New Delhi, April 26 (Agencies):** Hombarnü Congress Party lenir, Rahul Gandhi-i, linük nung senso ajak nem coronavirus vaccine angati agütsütsüla aser BJP inakyim ajanga linük sensotem takoksa mengudaktsütsüla, ta metetdaksü.

India nung vaccination mapatong tuluba May 1 nü tenzüka arrshi küm 18 nungi 44 tsüngdapurtem nem vaccine agütsütsü.

Rahul-i twitter ajanga Hindi oshi nung, "O peria lemtepogo. Linük nung senso ajak nem vaccine angati agütsütsüla. BJP inakyim ajanga India takoksa mengudaktsütsüla," ta ashi.

Congress Party-i sorkar dang nübur ajak nem vaccine angati agüjang, ta takhangba agüja arudar. Congress-isa Centre sorkari vaccination mapatong shidak meinyaker aser linük nung covid tensa

mazüokteter, ta aija arudar.

Uttar Pradesh aser Assam nati mezüng tain ajak nem coronavirus vaccine angati agütsütsü, ta sangdongba sülen Kerala, Chhattisgarh, Bihar, Madhya Pradesh aser Sikkim state temia coronavirus vaccine angati agütsütsü, ta sangdong. Tang tesüsa Delhi, Maharashtra, Gujarat, Odisha aser Rajasthan state temia vaccine angati agütsütsü, ta sangdongogo.



Ahmedabad, April 26, 2021: Hombarnü Ahmedabad nung aliba sorkar hospital ka kima ambulance nung coronavirus tashidak agi shirangertem anir aruba sülen hospital nung anioktsü atema atatepba noksa nung angur.





Manila, Philippines nung nisung kati pedicab ka anir senzuba noksa nung angur, kong nubur dang coronavirus tashidak menashia aoba nungi kumzüksü asoshi mask agiang, ta shia lir. Philippines nung COVID-19 tashidak agi Hombarnü tashinung nisung million ka dak tema menepogo aser ketdangsürtemi Manila aser anasa aliba province tem nung lockdown atsülangtsü asü mesüra salatsü, ta asadanga mapang ka lir.

### Somali opposition temi Mogadishu tesem kar lungbanga lir

**Mogadishu, Rongchii/April 26 (Agencies):** Somalia tiri kümsük atsülanga yimsü asütsü merangba mechi sorkar meyong sepaitem den rara adoker anogo ka lir Somalia opposition telok nungi prangbong bena alirtemi linük yimtiba, Mogadishu tesem kar agiogo.

Hombarnü prangbong bena aliba nisungtem aser machine gun inoka aliba garitem opposition tashi ita alidak anena liasü aser linük yimtiba nung tongtipang lenmangtem shibangogo, ta tenük kuli alirtemi ashi.

"Somalia security forces aser opposition busema nokdakba telok tem tongtipang lenmang kar anasa renemshia lir, yangji civilian tem senzür aser tesem kar nungbo parnok mesenzüdaksür," ta tenük kuli alir Abdullahi Mire-i osangbener dang ashi.

Küm aika civil war agi timtema aruba nungi tang shia aruba linük, Somalia nung February ita election magitetba ajanga yimtenren tsütsü timtem

tulu ajurua lir.

Tir Mohamed Abdullahi Mohamed, shiba dang Farmaajo ta ajar, pai ita tetenzüklen pa yimsüsüba küm ana atsülangtsü asoshi ozüing ya yangluba sülen par linük aser bendang linüktemi pa kanga sashia aitsür.

Deobar aonung sorkar meyong sepaitem aser opposition lenirtem den sendaktepa alirtem tsüingta linük yimtiba nung khatempa liasü.

Farmaajo indang kümsük atsülangba anema opposition busemer kari longkak aitba sülen Mogadishu north tsütsü Sanca aser Marinaya aser kanga mazüing aliba KM4 crossroad nung rongrong adok.

Saka tang tashi nisung asü-amaba osangbo mali.

Opposition teloki linük yimtiba nung tesem aika agiaka Hombarnep yangji khatempa mali, ta osangbener kati Nairobi nungi ashi.

1991 küm Somalia nung rara aser rongrong-shirong adoka liasü aser linük balala teyari agia

central sorkar amenoka linük tanaben yanglushitsü meranger. Iba mapang February ita election magitetba ajanga mepetmesü tali adok.

Hombarnüa tensa mejungi lir, kong nuburtemi pei ki yutsür aotsü meranger.

"Nuburtem Bermudo tesem nungi ainshi tenzüker, kong opposition busemertem yasüing arua raratsü renema lir. Tensa kanga mejungi lir, aser mashi mapang khatepsü," ta yangji alir kati osangbener dang ashi.

Somalia nung mangatetep adokba ajanga bendang linüktem tali tezü atanger, shirnoki Farmaajo dang linük indang federal state pongu den election atema jembishiniüang, ta akanger. Somalia Ato Kilonser Mohamed Hussein Roble-i Hombarnü osangbener senden ka nung jembidang, "Mogadishu nung temeshi Ramadan mapang yimjung tesunep dangi arutsü asoshi inyaktepba mapang azüdokshiba atema kanga jashir," ta ashi.

Pai sepaitem dang Mogadishu nung nuburtem kumzüka ayutsü atema inyaksü ajungshia liasü.

### Myanmar nung asendenshir longkak aittsü ayongzüker

**Yangon, Rongchii/April 26 (Agencies):** Myanmar nung junta anemertemi Hombarnü nuburtem dang electricity bill aser agricultural loan tem magütsütsü aser parnok chirnurtem school-i meyoktsü atema ayongzükerogo. General temi regional summit ka nung, sorkar atsüngtokba sülen mepetmesü tulu adoker aliba anendaktsütsü atema nangzükerogo saka nuburtemi parnok tenangzükerba ya süiki ia magir kechiyong iba tenangzükerpeba nung parnok tejangrabatem shisema mali.

Senior General Min Aung Hlaing-i, Indonesia nung Association of Southeast Asian Nations (ASEAN) summit nung mepetmesü adoker aliba anendaktsütsü nangzükerba sülen anogo ka lir Myanmar kübok yimti tulutem nung Deobarnü longak aitba sentong ayongzüker agiogo.

Junta tekolakbai, civilian sorkar lenir Aung San Suu Kyi

densema yimden yimsüsüba dak sendakba nung tepuokdak yua alirtem chioक्सü atema ayongzükerba magizük aser ASEAN accord nung iba mepetmesü tembangtsütsü atema mapang tejangja ka atakzükerja mali.

Military-i February 1 nü sorkar atsüngtokba sülen tang tashi nung security forces-i nisung 750 shi tepsetogo. Military anema nokdakba nuburtem tashiyim agi azüoktsü merangba mapang taküm aika samaogo.

Reuters-i asürtem osang tejangja magitet, kechiyong junta-i media nüjiso aginatokogo aser osangbenertem aika tepuokdak yua lir.

Linük nung mapang talangka military anema longkak aitba ajanga rongsenketsüing nung kongshioogo aser yawara agi meneptsü ana nung lir, ta international aid agencies temi tekümdangtsü metetdaksüiogo.

(Maneni tapak 10 nung...)

### Alima nung wara liaka mitkar tsütsü sen indokba timba akumer

**Stockholm, Rongchii/April 26 (Agencies):** COVID-19 tashidak wara agi rongsenketsüing nung kanga mejungi akoksajaka 2020 küm alima nung mitkar tsütsü sen indokba trillion \$2 jungnüa agi timba akumer, ta research agirtemi Hombarnü ashi.

2020 nung alima indang Gross Domestic Product (GDP) shilem 4.4 agi tilaba akumdang mitkar tsütsü senotsü indokba shilem 2.6 agi timba kuma sen billion \$1,981 shi liasü, ta Stockholm International Peace Research Institute (SIPRI) ajanga sangdong ka nung ashi.

Ibai meimlaba mapa ka lir, ta osang agütsür nungi Diego Lopes da Silva-i osangbener dang ashi.

"Tashidak wara tesem ajungalen lir asünung, mitkar tsütsü sen indoktsü ya ajema akumtsü amai bilemstü. Saka 2020 küm COVID-19 agi alima nung mitkar tsütsü senotsü indokba nung tajemba meliasü," ta Lopes da Silva-i ashi.

Mitkar dak senotsü indokba yimya mechi linük aikati süngmanga malitsü, ta pai ashi.

Rongsenketsüing jenjang tamajungba kumaka mitkar dak senotsü tanen makai timba indokba ajanga GDP ajunga nungi mitkar dak indokba tali kumogo.

2009 küm alima nung senotsü tsütsü timtem ajuruba sülen GDP nung mitkar dak senotsü indokba shilem 2.2 nungi 2.4 akumer, koba küm ka nung timba akumba tulutiba alitsü.

Iba yongji NATO züingsemtem timbai Alliance indang 'guideline target of spending' nung GDP indang shilem ana agi kongshir, koba 2019 küm linük tekui inyaka liasü aser 2020 küm linük 12-i inyak.

Ajisüaaka tashidak wara ya ajanga linük kar nungbo kongshiba sayur.

Tashidak wara den raratsü mechi Chile aser South Korea linüktemi mitkar dak senotsü indokba ajemtsü yimjak nung telemtetba agi.

"Brazil aser Russia linüki tashidak wara mechi senotsü lemsashi ta mashir saka 2020 küm atema yangluba budget dang nungi tajemba indok," ta Lopes da Silva-i ashi.

2008-2009 economic crisis mapang linük aika nung sorkari senotsü ajema indoktsü sentongtem yanglua liasü, saka tangbo yamaji masü, ta Lopes da Silva-i ashi.

Taoba küm alima nung mitkar dak senotsü timtiba indokba linük anaji US aser China liasü. US nung 2020 küm sorkari senotsü indokba shilem 39 bo mitkar dak liasü, aser China-i shilem 13 indok.

China economy ainba den külemi mitkar dak senotsü indokba timba akumer, aser küm 26 tashi tanen makai renloka arur aser 2020 küm sen billion \$252 shi indoka liasü.

US nunga mitkar dak rongsen indokba küm tenet tashi ajema aruba sülen küm asem tashi atonga timba indoka arur.

"Iba ya ajanga China aser Russia ama tongtipang lenmang balala nung tokteper nungi timtem agütsütsü akok ta angatetba tali tuluba akumba aser Trump administration ajanga US mitkar tesamar ta ajiteta tashi itshitsü asoshi inyakba sayur," ta ano iba report tezülur, Alexandra Marksteiner-i sangdong ka nung ashi.

Biden administration-ia mitkar dak senotsü indokba ajemtsü yimya kecha agia sayua mali, ta Lopes da Silva-i ashi.



Coronavirus tashidak prokshia aoba azüoktsü asoshi sorkari shishilembar atema tenokdangba tasen sangdongba mapa kuma inyaksü atema Lahore, Pakistan nung mitkartem yimti sema jajaba noksa nung angur. Pakistan nung coronavirus tashidak agi nisung menepba aser asüba tali akumba mapang ketdangsürtemi mozüki nung yipten aser ventilator tali inoksemstü arrsangba mapang lir.



# ASU indang 29buba Biennial General Conference tembangogo



**Kohima, Rongchii/April 26, 2021 (TYO):** Angami Students' Union (ASU) indang 29buba Biennial General Conference, koba anogo asem tashi ayongzük, iba sentong Deobarnü (25.04.2021) tembangogo, ta sangdong ka ajanga metetdaksü.

Iba General Conference shibangba sentong nung Adviser IT, Science & Technology, NRE, Mmhonlumo Kikon alakteta tejaoker ama aruagi dena liasü.

Iba sentong omen - "Prospect" nung ajemdaker Kikon-i kaketshirtem dang pei tebilembatem asadanga nukla tajung ayutsü asoshi ajungshiogo.

Taküm nung pei nukjidong den takok anguba tetezü atishia pai, nisung taküm nung nukjidong tejangja ka melira takok anguba tetezü kecha mali, ta ashi.

Kikon-i ashiba agi, Naga nunger ajak atema Naga yimtenren onük ya tongtibangtiba lir. Yimtenren tenzükba tsütsü lennirtem shimba ya inyakyim ka ama mesüadaksü, iba onük ya ajaki arok aroka shisadangsü nungdaker aser Naga nunger tarutsü tajungba asoshi tangatetba agi rajema alir lennir tajung shimtsüla.

Tarutsü tajungba den Naga nunger tejakleni aotsüsa sorkar, bureaucrats aser village council dak dang memetaloki asenok tsüngda kati ka ajungshitepa aser amalitepa inyaksüla, ta pai shisem.

**2021-23 kümsük atema ASU indang ketdangpur tasen yamai alitsü:**

- President - Bisevi Nakhro
- Vice Presidents - Kevilehou Zumu & Zhasakholie Kehie.
- General Secretary - Mhalievilie Medoze

Asst. G. S - Virato Naleo Secy.Education -Thepfiiriya Theiinuo

Secy. Games and Sports - Thomas Khawakhrie

Secy. Environment, Health and sanitation - Keyhoviü Medom

Secy. Info and publicity - Kevimecie Tsiikrii

Secy. Art & Culture - Azha Mezhi

Secy. Library and Archives - Metebo Sote

Secy. Women Affairs - Asato Paphino

Secy. Finance - Khriesamhalie David Mere

Treasurer - Kesavito Chalieu

Auditor General - Kelhoukholie Khate.

**\* Union Assembly:**

- Speaker - Viranu Ltu
- Deputy Speaker - Menolhousie Tsiikrii
- Assembly Secretary - Kekhrievotso Medoze

## April 29 nü State Level Coordination Committee senden agitsü

**Kohima, Rongchii/April 26, 2021 (TYO):** 7buba Economic Census dak sendakba nung, iba maparen jenjang/inakyim asadangshia jembishinütsü asoshi, 7th Economic Census nung State Level Coordination Committee (SLCC), Chief Secretary & Chairman-i Brehostibar (29.04.2021) nikongdang 2:00 ako meta Chief Secretary indang Conference Room, Secretariat, Kohima nung senden ka ayongzüksü, ta sangdong ka ajanga metetdaksü.

Iba senden nung SLCC indang züngsem ajak aruagi

adentsü asoshi mepishir.

**State Level Coordination Committee:**

1. Chief Secretary, Nagaland Chairman
2. Commissioner & Secretary, Industries & Commerce Member
3. Commissioner & Secretary, Rural Development Member
4. Commissioner & Secretary, Information & Technology Member
5. Labour Commissioner Member
6. Director, Industries &

Commerce Member

7. Director, Information & Public Relation Member

8. Director, Information & Technology Member

9. Director, Economics & Statistics Member

10. DDG, State Regional Office, NSSO (FOD), Kohima Member

11. Joint Director & Nodal Officer 7th EC, Eco & Stats Member

12. Special Secretary, Economics & Statistics Member Secretary

## Naginimora nung ki ka shibangtsür

**Mon, Rongchii/April 26, 2021 (TYO):** Covid-19 wara prokba aziüksü asoshi meta tapet agia, Deobarnü (25.04.2021) ADC Naginimora, Vineet Kumar IAS-i sangdong ka ajanga, osang tejangja magütsü tashi Police Colony, Ward No.08, Naginimora kübok House No. 21 shibangtsü tetuyuba agütsüogo.

Shibangtsüba tesem nung nisung kari danga temzüng anema aibelenba putetra, Indian Penal Code aser tanga tim inyakyim den Indian Penal Code indang Section 188 kübok merenshiba dak alia Disaster Management Act 2005 indang Sections 51 nungi 60 tashi agüja aliba tashi amshia temerenshi tapet agütsütsü, ta ADC-isa metetdaksü.

## Mon DC ajanga metetdaksür

**Mon, Rongchii/April 26, 2021 (TYO):** Covid-19 wara prokba aziüksü asoshi tapet meratem agia, Hombarnü (26.04.2021) DC Mon, Thavaseelan K IAS-i sangdong ka ajanga, osang tejangja magütsü tashi ghonda 48 atema Planning Office, Mon Town shibangtsü tetuyuba agütsüogo.

Ano sangdong tanga ka ajanga, osang tejangja ka magütsü tashi, Government Quarter, Wagiem Ward, Mon Town kübok House No. 159

shibangtsü asoshi DC-isa tetuyuba agütsü.

Shibangtsüba tesemtem nung nisung kari danga temzüng anema aibelenba putetra, Indian Penal Code aser tanga tim inyakyim den Indian Penal Code indang Section 188 kübok merenshiba dak alia Disaster Management Act 2005 indang Sections 51 nungi 60 tashi agüja aliba tashi amshia temerenshi tapet agütsütsü, ta kasa sangdong nung shia lir.

**OFFICE OF THE**  
**CHUMUKEDIMA LANGPANGKONG SENSO TELONGJEM**  
Dist. Dimapur - 797103 : Nagaland  
H.Q. Chumukedima  
**SANGDONGER**

COVID-19 tashidak wara tali züina aoba ajanga tensa mejungi aküm nung Chumukedima Langpangkong Senso Telongjem Moatsü sentong 1 May 2021 anogo nung amongtsü aliba thiena atar.

Sd/-  
**P. Chiten,**  
Tir

Sd/-  
**Imliakum Pongen**  
Tongti Zülur

**OFFICE OF THE**  
**LONGJANG SENSO MUNGDAK**  
P.O. : Impur, BPO : Longjang, Mokokchung : Nagaland

**TENÜNGSANG AGÜTSÜR**

Teyanglur Tsüngrem mulungnen yimtisanger nüksüng, Longjang senso tajung Rev. Dr. Mar Pongener lanuwa nungi Tsüngrem den tsüngchir süa taküm ajemalua tila kümer Kibubar wadang nung tenzükdang tai tarak meketi lia arur, alimai nü nübu agünüa Khrista kangki mesodak Impur lima nung ABAM Executive Secretary mapa inyaksü wadang tuluba, maongka agütsüba, akhüm tetushi khonang asen kümtetdakba Yisu Khrista tenüng nung Longjang senso ajanga tepela sangdonger.

Tsüngremi Rev. Dr. Mar Pongener aser par kibong azükarujangma aji sensosanger sarasadem.

Sd/-  
**M. Temjen Jamir,**  
President,  
Longjang Senso Mungdang.

Sd/-  
**Supongsashi**  
Secretary,  
Longjang Senso Mungdang.



**Sür küm ka ajungba menungra bilemtetter**



**LT. TEKATEMSU LONGCHAR**  
(01/01/1942 - 27/04/2020)

Onoki teti meima aliba ozü tebu Lt. Tekatemsu Longchar (Chungtia), sür küm ka abensaba anogo.

Oba nai onok rongjenseta toktsür orr tanü na meliakasa asen kinunger ajaki kanga dang menungraseta sarasadema amonger. Nü temeim shisatsü sempet tajungtem onok mulungjang nung teti lir, nü mapa tajungtem onoki kodanga amatsü makoker aser kanga dang menungar. Kenü anogo asenok ajak tepela nung ajurutsü sarasadem.

**- Temeim Kinungtsü, Jala, Jabaso, Semchir aser Kinungertem.**

**OFFICE OF THE**  
**MERANGKONG SENSO MUNGDAK**  
P.O TULI - 798618  
Dist. Mokokchung: Nagaland

Merangkong Senso Mungdang ajanga aguja aliba züngsemtemi temaba jenjang ajangzükteba aser takok jenjang ngutetba atema tutushi aser tenüngsang agütsür.

- 1) **Wb. Temjen Longkumer**, S/o Lt. Wb. Purtooshi & Lt. Wt. Iminukla-i Registrar(HOD), Department of Cooperation menden tongtetba asoshi.
- 2) **Dr. Imlirenla Jamir**, D/o Wb. T.Bendangtoshi Jamir & Wt. Ladongmongla-i Council of Scientific and Industrial Research, Hyderabad nung Scientist jenjang ngutetba asoshi.

Tarutsü nenok wadang nung Tsüngrem-i maneni moajang ta sarasademtsür.

Sd/-  
**N.TEMJEN**  
President

Sd/-  
**S.JONGPONGMAR**  
General Secretary

**OFFICE OF THE**  
**LANGPANGKONG TZÜKONG MUNGDAK**  
H.Q. Chuchuyimlang - 798614  
Dist. Mokokchung, Nagaland  
ESTD. 1933

*Date : 24th April 2021*

**SANGDONGER**

Langpangkong Tzükong Mungdang Sanen luden 6th April 2021 anogo Chuchuyimlang H.Q nung senden mena 13th -14th May 2021 Inti Mungdang amongtsü lemtet.

Mungdang amongtsü Riongsanger Putu Chuchuyimlangi pelashishia jaok nung LTM mendendi nungi pelaba metetdaksür.

Sentongdonger ludeni maparen ajak tenzuka oya-a lia Covid-19 wara tanubaba züsemi menepa aru nung, iba tashidak wara nungi neburtem kümsüka ayutsü tongtipang ta angateta iba Inti Mungdang mapang tatsüka atema thi-ena atar ta Tzükongsanger ajak dangi LTM mendendi ajanga sangdonger.

Tensa tajungba küma yakta iba Mungdang katettsü ajaki sarasadema atadi ta ayongzükter.

Sd/-  
**(Wb. M. Zülü Ozüküm)**  
President  
LTM H.Q. Chuchuyimlang

Sd/-  
**(Wb. LANU. PONGEN)**  
General Secretary  
LTM H.Q. Chuchuyimlang



## Deepika Kumari aser Atanu Das nati gold angu

**Rongchii/April 26, 2021 (Agencies):** Tawa kibong akümba archery couple Deepika Kumari aser Atanu Das nati gold medal ana anguba sülen India team-i World Cup asayaa aruba rongnung taküm takok tajungtiba ngutetogo. Parnoki asayamung mezüngbuba stage nung gold asem aser bronze medal ka kokogo.

Taoba mapang world No. 1 asayar Deepika-i la indang career nung gold asem buba koktetogo aser la kinungbo Das-i world cup nung tang mezüngbuba tebur recurve individual final koka gold nguogo.

Tenaprongla Archery World Cup Final atema qualify süadokogo.

"Küna külemi senzür, külemi training agir, külem tokteper aser takok angrur," ta Das-i Deobarnü gold medal anguba sülen ashi, shiba 2020

küm June ita Deepika den kibong aküm. "Lai ni aginüba meteta lir aser ni lai aginüba meteta lir," ta paisa shi.

Küm ana shi lir tang mezüngbuba international jenjang nung asayaba mapang India recurve archers team-i gold ana aser bronze ka ta ngutetogo, koba World Cup nung takok tajungtiba anguba asütsü.

Jayanta Talukdar-i 2009 küm Croatia nung takok anguba sülen tang mezüngbuba tebur recurve asaya nung Das-i gold medal ngutetogo.

Iba asayamung nung India tetsür team nung Deepika, Ankita Bhakat aser Komalika Bari nungeri küm tenet sülen mezüngbuba gold angu. Parnoki final nung Mexico team 5-4 (27-26) agi akok.

Kasa mapang nung tarep temeyokteper asaya nung Das aser Ankita Bhakat nati USA nungi top seed tarep 6-2 agi

koka bronze medal angu.

Iba sülen kija asaya nung Deepika Kumari aser Atanu Das nati pei tata asaya nung gold medal ngua liasü.

Deepika-i final asaya nung USA tsür Mackenzie Brown 6-5 (9\*-9) agia kok. Semi nung lai Mexico tsür Alejandra Valencia 7-3 agi koka liasü.

2018 küm Salt Lake City nung gold anguba sülen tang mezüngbuba Deepika-i gold medal ka ngutetogo, koba la asoshi tasembuba gold medal asütsü.

Kasa mapang nung Das-ia, final asaya nung Spain nunger asayar Daniel Castro 6-4 koka World Cup nung mezüngbuba jurila medal koktetogo.

Pai 2016 küm Antalya nung asayaba mapang jenjang pezübuba tashi dang tongteter liasü.

Semi final asaya nung pai Mexico nunger asayar Angel Alvarado tsükdaktsü.

## Barcelona Open akokba sülen

### Nadal tanabuba jenjang tongogo

**Rongchii/April 26, 2021 (Agencies):** Hopta tatemi Barcelona nung kanga meranga asayar takok anguba sülen Rafael Nadal-i, Daniil Medvedev ajateta Hombarnü sayaba ATP rankings nung tanabuba jenjang tongtetogo. Pa ATP rankings nung Novak Djokovic sülen tanabuba jenjang nung lir.

Arishi küm 34 tain asayar shibai pa indang career nung iba asayamung 12 benbuba kokogo, pa Medvedev dang nungi point 110 agi timba kümogo.

Iba takok ya Nadal asoshi clay court nung takok 61buba liasü. Clay court nung asayamung timtiba akokba atema pai otsü tasen ka yanglua lir aser pa sülen tanabuba jenjang nung Argentina nunger

asayar Guillermo Vilas lir, shibai asayamung 49 koka lir. May 30 nü nungi tenzüka Roland Garros nung French Open asaytsü lir aser asayamung akoktsü imlar rongnung Nadal temaba jenjang nung lir.

Barcelona Open final nung Nadal-i tsükdaktsüsang Greece nunger asayar Stefanos Tsitsipas jenjang pongububa nung lir. Pa Austria nunger asayar Dominic Thiem sülen lir.

Spain nunger asayar Pablo Carreno-i, Belgium nunger asayar David Goffin ajateta jenjang 12buba tongtetogo aser kasa mapang nung arishi küm 19 tain Italy nunger asayar Jannik Sinner, shiba Barcelona Open semifinal nung Tsitsipas-i tsükdaktsü, pa jenjang 18buba tongtetogo.

#### April 26 nung tashi nung ATP rankings vamai alitsü:

1. Novak Djokovic (SRB) 11963 pts
2. Rafael Nadal (ESP) 9810 (+1)
3. Daniil Medvedev (RUS) 9700 (-1)
4. Dominic Thiem (AUT) 8365
5. Stefanos Tsitsipas (GRE) 7980
6. Alexander Zverev (GER) 6125
7. Andrey Rublev (RUS) 6000
8. Roger Federer (SUI) 5875
9. Diego Schwartzman (ARG) 3765
10. Matteo Berrettini (ITA) 3568
11. Roberto Bautista (ESP) 3090
12. Pablo Carreno (ESP) 3015 (+1)
13. David Goffin (BEL) 2885 (-1)
14. Denis Shapovalov (CAN) 2820
15. Gael Monfils (FRA) 2770
16. Hubert Hurkacz (POL) 2600
17. Grigor Dimitrov (BUL) 2576
18. Jannik Sinner (ITA) 2548 (+1)
19. Milos Raonic (CAN) 2495 (-1)
20. Felix Auger-Aliassime (CAN) 2418

## Shearer & Henry na Premier League Hall of Fame nung züngoksem

**Rongchii/April 26, 2021 (Agencies):** Taoba mapang Newcastle United striker Alan Shearer aser Arsenal forward Thierry Henry na Premier League's Hall of Fame nung züngoksemba mezüngbuba asayar kümogo, ta league-i Hombarnü metetdaksü.

Shearer ya Premier League nung goal timtiba indaktsüba asayar lir. Pai Premier League seasons season 14 nung Newcastle aser Blackburn Rovers nungi asayaba mapang goal 260 idaktsür lir.

Taoba mapang England nunger international asayar, shibai 1994-95 season nung Blackburn nungi asayaba mapang Premier League title kokogo, pa kijai club balala nungi goal noklang kaka idaktsür lir.

"Premier League nung kanga junga asayartem repringdangra Hall of Fame nung züngoksemba atema kanga tushia bilemer," ta Shearer-i ashi.

"Ni jangraba ajak agi professional footballer ka akümtsü dang liasü. Ni St James' Park nung goal idaktsütsü aser takok marok angutsü aser number nine asemstsü nükjidong liasü. Ni minute ajak jangradema asayaogo," ta paisa ashi.

Taoba mapang France nunger international asayar Henry-i club atema otsü tasen ka yanglua Arsenal nungi Premier League asaya 258 nung goal 175 idaktsür lir.

Pai league title anaben kokogo aser 2003-04 campaign nung kechaia akoktsü makokba

team ka nung pa tongtibang asayar ka liasü. 2002-03 season nung pai assist 20 süja otsü tasen ka yanglu.

"Alan Shearer den külemi Premier League Hall of Fame nung mezüng züngoksemba asayar rongnung densemba atema kanga pelar," ta Henry-i ashi.

"Ni tanur asüdüng boot danga alitetsü atema meranga liasü aser tangbo Hall of Fame indang jembar," ta pai ashi.

League-i ashiba agi, 1992 küm nungi tenzüker asayayonga aruba mapang takok tajung nguteba asayartem Hall of Fame nung züngoksem. Asayartem Hall of Fame nung züngoksemstsü atema 2020 küm August 1 nü tashi nungbo asaya nungi anener alitsüla.

## Myanmar nung asendenshir longkak... (Tapak 8 nungi...)

Pro-democracy activists temi Hombarnü nungi tenzüka parnok inyakym tajangba inyakym aotsü ayongzükogo. Parnoki electricity bill aser agricultural loan magütsütsü mulungtetogo aser iba den tanurtem school-i meyoktsü telemtetba agi.

"Jila balala, kiyong balala, tesem aser state balala nung aliba nüburtem ajak longjemer military junta anema iba sentong takok asoshi inyaktsüla," ta Khant Wai Phyoi, Deobarnü Monywa jila nung longkak aitba sentong ka nung o jembiba mapang ashi.

"Asenoki parnok inyakym nung shilem magütsü, asenoki parnok tashi angaa manidaktsü," ta paisa ashi.

Osang tejangja agütsü atema junta otongdar ka den tongteprateptsü merang ajisüaka kecha telangzüba magütsü.

ASEAN senden nung onük pongu agizüka ayuba longkak aitertem magizüker. Senden nung azütokshi anentsü, lokti ajak tsüngda sensaksem tenzüksü, linük balalai teyari agütsüba agizüktsü, special ASEAN envoy ka shimtsü, shiba Myanmar semdangtsü atema temelaba agütsütsü atema mulungtepa liasü.

Iba tenangzüktepa nung yimden yimsüsüba dak sendakba nung tepuokdak yua alirtem indang shisema mali, ajisüaka kasa sangdong ajanga ashiba agi, iba senden nung item tepuoktertem chiochtsü atema benoka sensaksemogo.

Arishi küm 75 tain Suu Kyi ya ken o aika nung aija lir, kong colonial-era official secrets act ka nung aitsüba densema lir aser iba ajanga la tepuokdak küm 14 ayutsü akok.

Lai 1991 küm Nobel Peace Prize kokogo aser küm aika

military yimsüsüba anema Myanmar nungertem anir inyaka aruogo. November it lai aniba party-i election tanabuba term akok aser election commission-i vote agütsüba inyakym nung ochi mashi ken o kecha sendaka mali ta shiaka military, shirnok indang kandidatet tem kanga mejungi tamakok angu, parnok election inyakym nung ochi mashi ken o aika sendaka lir ta shia civilian sorkar atsüngtok.

Hombarnüa video link ajanga Suu Kyi anema benokba ken o angadangtsü liasü.

Security officials matsüngdang la video link ajanga la indang okatsür den sensak asemstsü atema temelaba agütsüogo aser military-i sorkar atsüngtokba sülen linük nung mepetmesü tulu adokba indang lai jangjaa ali mali iba indanga kecha memetet.

## Pat Cummins-i USD 50,000 tenla agütsü

**Rongchii/April 26, 2021 (Agencies):** Kolkata Knight Riders' nungi Australia nunger pacer Pat Cummins-i Hombarnü oxygen supplies atema PM CARES Fund nem USD 50,000 tenla agütsütsü ta sangdongogo. India nung Covid-19 tashidak agi kanga mejungi kongshir aliba mozükitem nung oxygen supply agi anüngba mesemstsü atema pai iba tenla agütsü.

Kasa mapang nung pai IPL maneni asayayonga aotsü pusemogo aser ashiba agi, India sorkari tensa kanga majungba mapang iba asayamung repringba ajanga ghonda ishika atema tepela bener arutsü ta shiogo.

Pa indang official Twitter handle ajanga pai iba osang sangdonga liasü aser tanga asayartem danga kasaji tenla tajung agütsütsü mepeshi, kechiyong India nung Covid-19 tashidak tanaben poktetshir kanga timtem nung lir.

"COVID-19 tashidak menar kanga aika akümba mapang ka nung IPL maneni asayayonga

aotsü ya tim asü masü ta idaki kanga bulua sensaksemogo.

"India sorkari linük mokdang aliba mapang IPL asaya repringba ajanga nüburtem nem tensa amadokdaksür ghonda ishika tepela agütsür ta ashiba ni angazükogo," ta Cummins-i ashi.

India nung Hombarnü nisung lakh 3.53 dak covid-19 tashidak potetogo, koba alima ajunga nung taoba küm wara pokteter anogo ka nung nisung timtiba dak tashidak potetba asütsü.

"Tang nisung aika timtem tekangshia nung aliba ngua ni kanga mepelar," ta pai ashi.

Anogo ishika tejakdang Rajasthan Royals pacer Andrew Tye-i asayamung toktsür aotsü telemtetba agiogo, kechiyong pa par linüki maitdaksütsü akok ta tsüba bilem.

Kasa mapang nung Australia nunger bowlers Adam Zampa aser Kane Richardson nata jurila maparen kar aliba ajanga asayamung toktsüogo, ta Royal Challengers Bangalore-i Hombarnü metetdaksü.

## BILEMDANGANG

"Nisung aika tetsüba agi nükjidong metongteter."